



REPUBLIKA E SHQIPËRISË

**KOMISIONERI PËR TË DREJTËN E INFORMIMIT  
DHE MBROJTJEN E TË DHËNAVE PERSONALE  
DREJTORIA PËR MBROJTJEN E TË DHËNAVE PERSONALE**

Nr. 1463/prot.  
3

Tiranë më 12.11.2018

**VENDIM**

Nr. 63, datë 12.11.2018

**MBI**

**ZBATIMIN E LIGJIT PËR MBROJTJEN E TË DHËNAVE PERSONALE**

Në mbështetje të neneve 29, 30 dhe 32 të Ligjit nr.9887 datë 10.03.2008 "*Për Mbrojtjen e të Dhënave Personale*", neneve 77-112 të Ligjit Nr. 44/2015 "*Kodi i Procedurave Administrative të Republikës së Shqipërisë*", si dhe provave të administruara në ngarkim të kontrolluesit Shkolla "*Tirana Jonë*",

**KONSTATOVA SE:**

Në zbatim të Urdhrit Nr. 239 datë 01.10.2018 të Komisionerit për të Drejtën e Informimit dhe Mbrojtjen e të Dhënave Personale, u krye hetim administrativ pranë kontrolluesit Shkolla "*Tirana Jonë*", me objekt:

- Zbatimi i Ligjit Nr. 9887 datë 10.03.2008 "*Për mbrojtjen e të dhënave personale*" dhe akteve të miratuara nga Komisioneri, në lidhje me mbledhjen, përpunimin, ruajtjen dhe sigurinë e të dhënave personale, gjatë kryerjes së aktivitetit të kontrolluesit, Shkolla "*Tirana Jonë*".

Në funksion të Ligjit Nr. 9887 datë 10.03.2008 "*Për mbrojtjen e të dhënave personale*", Shkolla "*Tirana Jonë*", është kontrollues i cili mbledh dhe përpunon të dhëna personale të kategorive "*punonjës*", "*nxënës*" dhe "*prindër*". Kontrolluesi Shkolla "*Tirana Jonë*", është subjekt juridik me NIPT: K61604011C.

Komisioneri për të Drejtën e Informimit dhe Mbrojtjen e të Dhënave Personale, pasi shqyrtoi relacionin e hetimit administrativ, procesverbalin e konstatimit dhe provat e administruara gjatë ushtrimit të hetimit pranë kontrolluesit Shkolla "*Tirana Jonë*", konstaton se:

1. Kontrolluesi Shkolla "*Tirana Jonë*", nuk ka kryer detyrimin për "*Njoftim*" pranë Zyrës së Komisionerit mbi përpunimin e të dhënave personale në zbatim të nenit

21 dhe 22 të ligjit. Konstatimi përbën shkelje administrative të nenit 21 dhe 22 të Ligjit Nr. 9887/2008 "Për mbrojtjen e të dhënave personale" i cili parashikon: "Çdo kontrollues duhet të njoftojë Komisionerin për përpunimin e të dhënave personale, për të cilat është përgjegjës...".

2. Kontrolluesi Shkolla "Tirana Jonë", nuk ka hartuar rregulloren specifike për mbrojtjen e të dhënave personale në zbatim të nenit 27 të ligjit.

Duhet kuptuar drejt nga kontrolluesi, rëndësia që ka hartimi i një rregulloreje të mirëfilltë për mbrojtjen e të dhënave personale, dhe përdorimi i saj nga nëpunësit e tij, si një akt bazë i cili ndërgjegjëson dhe detyron punonjësit për ruajtjen e konfidencialitetit, ruajtjen nga keqpërdorimi dhe mënyrën e administrimit të të dhënave personale.

3. Ambientet e brendshme në të cilat kontrolluesi ushtron aktivitet, janë të mbikëqyrura nëpërmjet sistemit të video-survejm CCTV. Konstatohet që kontrolluesi nuk ka vendosur tabelat informuese me qëllim informimin e subjekteve, mbi përpunimin e të dhënave imazhe-video, nëpërmjet sistemit të video-survejmimit (CCTV).

Zyra e Komisionerit vlerëson se informimi mbi përpunimin e të dhënave, është një detyrim ligjor i rëndësishëm për kontrolluesit, pasi u jep mundësinë subjekteve të të dhënave që të ushtrojnë të drejtat ligjore që gëzojnë në zbatim të Ligjit Nr. 9887/2008 "Për mbrojtjen e të dhënave personale".

Në përfundim të kontrollit administrativ, referuar provave dhe konstatimeve në vend, grupi i inspektimit ka hartuar procesverbalin (datë 18.10.2018), të cilin përfaqësuesi i kontrolluesit e ka nënshkruar duke paraqitur komentin: "U njohëm me procesverbalin e grupit të inspektimit dhe do të marrim masa brenda datës 26.10.2018, për plotësimin e konstatimeve".

Në zbatim të neneve 87-89 të Ligjit Nr. 44/2015 "Kodi i Procedurave Administrative të Republikës së Shqipërisë", kontrolluesi Shkolla "Tirana Jonë" është njoftuar të marrë pjesë në seancë dëgjimore pranë ambjentëve të Zyrës së Komisionerit. Kontrolluesi është paraqitur në seancë dhe ka dokumentuar rikuperimin e shkeljeve administrative të konstatuara në kontrollin e ushtruar pranë tij. Në shkresat e paraqitura, kontrolluesi shprehet se ka plotësuar:

1. Formularin e Njoftimit;
2. Modelin e tabelës informuese;
3. Rregulloren "Për Mbrojtjen e të Dhënave Personale";
4. Model Deklaratë Konfidencialiteti.

Zyra e Komisionerit e vlerëson këtë qëndrim dhe reflektim të menjëhershëm, por kjo nuk e përjashton kontrolluesin nga përgjegjësia administrative. Shkeljet e konstatuara, janë të një natyre serioze, pasi ato lidhen ngushtë me garantimin e parimeve në përpunimin e ligjshëm të të dhënave personale, saktësinë që duhet të kenë të dhënat dhe kur është e nevojshme korrigjimin e tyre.



Kontrolluesi Shkolla "Tirana Jonë" në formën ligjore të aktivitetit të tij tregtar, është person juridik i themeluar në vitin 2004. Nga momenti i hyrjes në fuqi të Ligjit Nr.9887/2008 "Për mbrojtjen e të dhënave personale" dhe deri në momentin e ushtrimit të kontrollit administrativ nga Zyra e Komisionerit, ka patur të gjithë kohën e nevojshme për t'u njohur me këtë legjislacion dhe me detyrimet që rrjedhin për zbatimin e tij.

Si përfundim shkelja e konstatuar gjatë ushtrimit të hetimit administrativ, në lidhje me mungesën e rregullores specifike "Për mbrojtjen, përpunimin, dhe ruajtjen e të dhënave personale", në kuptim të nenit 39, pika 1, gërma "dh" të Ligjit Nr. 9887/2008 "Për Mbrojtjen e të Dhënave Personale", përbën kundërvajtje administrative dhe sanksionohet me gjobë si më poshtë:

*"Kontrolluesit ose përpunuesit, që nuk marrin masat e sigurisë së të dhënave dhe nuk zbatojnë detyrimin për ruajtjen e konfidencialitetit, të përcaktuara përkatësisht në nenet 27 dhe 28 të këtij ligji, dënohen me nga 10.000 deri në 150.000 lekë"*

Në bazë të nenit 39/2 të Ligjit Nr. 9887/2008 "Për mbrojtjen e të dhënave personale", për kundërvajtjet e mësipërme administrative, dënohet me dyfishin e gjobës së përcaktuar në pikën 1 të këtij neni.

Për zgjedhjen e masës së gjobës Zyra e Komisionerit ka mbajtur parasysh faktin se Kontrolluesi Shkolla "Tirana Jonë", është angazhuar në mënyrë të menjëhershme në rikuperimin e shkeljeve të konstatuar nga grupi i kontrollit. Ky fakt ka ndikuar në përcaktimin e vlerës së masës së gjobës referuar dispozitave të Ligjit Nr. 9887/2008 "Për mbrojtjen e të dhënave personale".

### **PËR KËTO ARSYE:**

Në zbatim të neneve 27, 29, 30, 39 pika 1, gërma "dh", si dhe nenet 40 dhe 41 të Ligjit Nr. 9887 datë 10.03.2008 "Për Mbrojtjen e të Dhënave Personale",

### **V E N D O S A:**

1. Dënimin e kontrolluesit Shkolla "Tirana Jonë", me gjobë në vlerën 20.000 (njëzetëmijë) lekë për shkelje të detyrimeve të përcaktuara në nenin 27 të Ligjit Nr.9887 datë 10.03.2008 "Për Mbrojtjen e të Dhënave Personale".
2. Gjoha arkëtohet nga kundërvajtësi në Buxhetin e Shtetit, jo më vonë se 30 (tridhjetë) ditë nga komunikimi i këtij vendimi. Me kalimin e afatit të ankimit, ky vendim kthehet në titull ekzekutiv dhe ekzekutohet në mënyrë të detyrueshme nga zyra e përmbarimit.

3. Kundër këtij vendimi mund të bëhet ankim në Gjykatën Administrative të Shkallës së Parë, Tiranë, brenda 30 (tridhjetë) ditëve nga komunikimi i këtij Vendimi.

Ky vendim u shpall sot më 12.11.2018.

